



浮山縣誌卷之三 下冊



明

羅端 河南鄧州舉人弘治間治縣事廉明仁厚遇
歲荒曲加撫字賑濟有法民賴以蘇卒於官士民
莫不垂涕為之罷市見祀名宦

王綸 直隸開州人庚戌進士成化中知縣事作興
士類愛民如子嘗刻表忠勸學二錄令民誦讀以
勵風俗後子崇慶任本省按察副使見祀名宦
李乘雲 直隸高陽舉人孤清英毅有文武才崇禎五

年流寇數萬逼邑城公膂力善射一發殪賊之渠魁賊遂却城賴以全以卓異行取入京尋陞本省兵備遷河南大梁道守禹州十五年闖寇以全軍薄城公蒞任方新衆寡不敵遂為所陷賊令之降公不屈厲聲罵曰本道朝廷命官豈向汝狗輩亂賊求活耶賊怒以桑條鞭其腎罵不絕口又令割其舌而以火砲擊斷其頸而死烈哉苦節較常山而過之賊初下令屠城曰何砲傷我多人公曰發砲乃本道所命於百姓何干賊遂止今河南已列忠臣祠而吾浮蔘跡之地魂魄所依宜有蒸嘗以

昭懿典

國朝

安應耀三韓人貢士方正有重望慈成兼濟己丑庚

寅之際餘孽縱橫盤踞東南鄉百姓苦之自其下車推心招撫俾千總秦文英鄉耆張三鳳抵賊營開喻順逆降賊衆八百餘人賞其偽遊擊李元標等六人銀各五十兩幣數疋安插得所境內悉平仍請蠲除傷亡荒糧數千石殘民賴以頓蘇

揚名世河南商城舉人綜核敏給於民情無不周知好微行每夜出見縱飲博戲者輒拘治之盜賊屏

息百姓安堵本地風習鄙野婦女裝束推魯公令
悉去其高髻一如臨襄式樣旬月之間舊俗頓改
而且大新邑學廣育英才處之社館以養其德業
至呼字而不名士風因之以丕變

羅 博河南鄭州人戊戌進士志氣方嚴以風節自
持懸令與百姓約但所告訴與所爭之事不合者
即反坐民畏之訟獄衰息一境肅然抑且加意人
才大興文教闢閒館於公署之左暇日課士俾諸
生有德有造文運光啓者則其力也

西漢

霍 光字子孟史冊皆書霍光為平陽人其實非謬
殊不知當時所謂平陽者謂之平陽縣隸河東郡
猶今之歸汾然非謂平陽府也自秦漢迄三國吾
浮尚未置縣南北朝始分析之光所居之南霍村
正是平陽東鄙今屬浮山故當為浮山人光世居
本縣之南霍村武帝時為奉車都尉後元二年受
遺詔輔少主為大司馬大將軍兼領尚書事始元二
年春封大將軍光為博陸侯地節二年卒詳見藝
文

東漢

鮑永光武時大將安集河東破青犢賊有功還報光武曰賊已平國已寧邑人因名其里云今在縣北十五里號平寧村永初從更始起兵為別將建武二年知更始已亡罷兵歸帝帝問卿兵安在永對曰臣事更始不能令主全誠恥以其衆幸富貴累以立功為帝所用及為司隸校尉辟扶風鮑恢為從事並抗直不畏權禦會帝叔父趙王良從帝送來歙喪還入夏城門與中郎將張邈爭道又詰責門候永劾其無藩臣禮大不敬良貴戚尊重而求劾之朝廷肅然帝曰貴戚且歛

手以避二鮑

五代

桑維翰字國僑博極羣書嘗臨鏡自竒曰七尺之軀不如一尺之面屢就試有司惡其姓名不取有勸其改業者翰指其鐵硯示之曰硯磨穿乃改魯作日出扶桑賦以見志卒第進士仕晉為中書令兼樞密使事詳見藝文

宋

邢昺為世名儒第進士嘗註論語孝經太宗朝進講師比二卦帝嘉其精博召為國子監丞專講學之

任真宗咸平二年以昂為侍講學士旋為侍讀學士時設直廬於秘閣以楊徽之數人及昂更直召對尋召昂與杜鎬等校定周禮儀禮公羊穀梁春秋爾雅義疏諸書始正坐講之議歷官至學士兼因子監祭酒賜紫金魚袋詳見正史

金

邢德貞宋學士昂之後歷官至禮部侍郎曾修太和律令

邢天祐德貞之子也登正大間狀元按正大為金哀宗年號時金已遷汴日事兵爭公當時秩典清華

元

事少槩見然既為鴻臚首唱五百載科甲第一人其有光於吾里多矣薦列鄉祠誠為勝事

唐天瑞歷官至山東濟南府知府多惠政以壽考卒於家

張天瑞世居邑城殷富甲於鄉里世祖西征道經平水瑞以才畧備參謀會軍乏食瑞輸粟萬石助之一軍悉贍世祖封為萬戶侯錫以五蠻蟒玉墓文具載其事

明

李信居城西北賈庄村洪武間以能吏薦舉入京
為兵部屬官遇當點兵司事者候帶冊籍信背憶
而呼之無一人差謬者歷官至吏部侍郎尋陞本
部尚書

韓求為兵科給事中事跡無可攷入鄉祠

陳福始以儒士充藩司掾既而改隸兵部武選司督
力善劍正統己巳之秋英宗北狩福方以歸省居
田間聞變即投袂而起自詣縣官提二長劍號泣赴
難當事者授以裨將與將軍石彪聲援相應屢建
奇功當歸凱患甲風未及受賞而卒憲宗時子孜

同年狀元吳寬作詩褒之有萬里煙塵雙劍掃九天
日月一身扶之句卒時年三十有六後以子貴贈監
察御史

陳孜字敏學中成化乙酉鄉試書經魁壬辰進士
授浙江慈谿知縣擢貴州道監察御史陞湖廣按察
司副使尋陞雲南按察使又陞陝西右布政轉貴州
左布政使致仕進階資德大夫歷官所至有聲跡每
於庭前懸楊震却金圖以杜餽遺為御史正色立朝
彈劾不避權貴詳見藝文

張永茂嘉靖元年貢授陝西綏德州判官尋陞安定

知縣居官十三年剛正廉明一錢不取致仕歸鄉囊
篋如洗蔬食步行一第不治每以孝弟忠信諭俗卒
之日老幼垂泣以為鄉失典型
張九德字見徵萬曆三十年貢授直隸香河縣丞陞
贊皇縣知縣方直孤清風裁嚴正天啓中魏瑞亂政
勢傾朝野九德以不建生祠忤其意竟削籍焉九德
怡然不為戚

國朝

秦吉士字楨皇氣度飄逸文學淵博善撰工詩詞而
書翰尤為精絕崇禎十六年貢士 國初順治間安

公應耀子世鼎知保德州事辟以為記室庚寅夏岢
嵐道副使樓公義視師保德偶見而奇之即以署本
州學正卒於官平生樂天知命不求聞達有座箴云
進以禮退以義得不得有命為行或使止或尼遇不
遇皆天也

明



齊國賢字德齋邑率廩膳生員素以氣節文章自負
崇禎五年巨寇紫金梁至南王村見其狀貌奇偉欲
以為謀主國賢怒罵不絕口遂遇害而其弟婦葛氏姪

婦張氏相繼死節焉時有其甥葛榮亦被擄具言其
德行風烈於賊亡感歎祭之以豚知縣李乘雲上其
事褒之曰生負奇才月旦之評不爽死全大義歲寒
之操可嘉雖綠林之暴尚悔禍而革心而碧血之魂
當浩然以吐氣葛氏捐身於絕壑張氏畢命於重泉
三烈一門英徽振古勅賜浩氣塞天之額以旌其烈

國朝

秦士鳳邑學武生員順治己丑浮邑適為綠林所困
盜賊充斥士鳳分戍東城拮据盡瘁殊無寧晷三月
二十日士鳳及鄉兵與賊戰於北石村殺傷相當次

日追賊於邢翟村賊據南山以為險知縣王廷佐親
率鄉兵直逼之是時賊方得地利我兵恃其衆綠崖
而上士鳳獨當一面奮勇先登賊頗披靡而後軍不
繼力竭被殲焉從行義勇劉波武生喬瑾奮身救之
皆遇傷王縣公操文遇難辭極悲恸士民皆為感泣
士鳳年二十有九

李先春邑學武生也己丑之亂縣主以其曾為晉陽
守備習行間事俾領鄉兵邢翟之役冒險衝陣揮大
刀連砍數賊以誤踐危石而蹶遂被害其子李全娃
亦同時戰死邑人共傷之吊辭有憐君父子俱殉國

午夜愁聞杜宇聲之句

王牧民字仁襄順治間以明經授浙江平陽縣丞海寇奄至破其城逼令降牧民執節不屈死之高象先字斗南邑庠生甲申秋邑為偽官所殘象先被執偽衡山伯欲磔之至死無屈言曾有旌額

明

張氏邑學廩生許鳳妻也明萬曆中鳳以苦讀成癆卒張氏年少無子哀恸累日不食當夫死之七日曉起束紵撫夫靈而哭之乃乘間自經於柩側曾經奉

勅旌表詳見列女

張氏邑民郭九伉妻崇禎間賊至史壁村氏時以歸寧居母家為賊所執欲犯之氏以善言相誘伺其隄防稍懈遂投堡下深崖而死已經旌表

張氏邑民齊鳴皋妻也崇禎間賊紫金梁攻破南王洞氏被執賊欲掠之以去時氏有服制在身給之曰我既行宜換言服相從賊稍踈防閑氏即乘間投路傍井中以死

國朝

周瑞邑千揆也父家俊得嘔血疾百藥無效瑞於暗夜

中焚香籲天割左股肉置湯中令父飲之而家人不知也其父尋甦延壽者數載邑侯詣門驗視旌表有人子之愛親固天倫之恒事而傷身以見志亦人情之所難等語

馬氏邑人衛旗妻夫故時馬年十八生男禎方二歲而姑舅且老馬紡績為養守志三十餘年貞白無玷至大八年旌表其門

明

郭氏邑人陳敬妻十九歲而守義詳見列女

蓋理妻張氏十八歲而寡子世望纔數月張撫之成立為邑庠生孫彪亦入學食廩家範肅然曾經旌表

衛道妻張氏夫為邑庠生張二十六歲而寡清寒自守撫其二子朝縉朝紳皆入學成名朝縉大清初由明經任廣陵訓導

齊國才妻笄氏崇禎間與子齊鳴辜妻張氏同死流寇之難事附見義士類

王心妻張氏夫為邑庠生張二十五歲而寡子牧民尚幼張撫之成立遊宦即順治中死海寇之難者有司旌

海山縣志 三卷十
之有冰心幽婉玉質貞閑守名閨之芳型嫺女箴於
內則等語

侯維新妻陳氏二十六歲而寡子讓方在冲齡陳守育
之得入邑庠貞節孝行雙經旌表

喬維通妻張氏二十有八而寡清苦自厲撫其子盛等
成立勤渠竭力以奉翁姑塋祭如禮盛克本邑掾吏有

孝行入國朝尚蒙旌賞布粟知縣揚三辰且有旌節
獎孝之額

張推妻高氏性淑靜二十有四而寡撫其孤雲路雲鵬皆
克成立雲鵬為邑庠生有文名有司有節比松筠栢年

自矢之褒

衛朝紀妻齊氏二十五歲而寡公姑俱亡子皇極甫三
歲齊厲志守節紡績清苦凡五十餘年壽八十二而卒
有司以扁旌其門

高衡妻陳氏二十二歲而寡生三子皆幼與姑同守節家
計蕭然陳艱貞矢志者凡五十年

成文妻喬氏年二旬而寡子錦章方在孩祖龍年踰七
袞即武進士斌才之父也門祚衰微俯仰無繼卒能奉
祖育孤以厲節

蓋國典妻鄒氏夫為邑庠生鄒三十而寡二子忠方六

歲怨生總數月刻苦守志備歷艱辛忠力學遊泮
有文聲鄒年踰七旬壺儀可則

周家宰妻姜氏三旬有八而寡三子皆幼而家道復
艱妻清苦自持冰霜厲操撫其子珣勤學入庠為文
學之士有司以孝友舉德行曾經學使者徐公謂弟
獎賚優崇

楊瑤森妻陳氏年二十而寡生子標未週歲矢志苦守
迄今四十餘年撫其子成立
李鎧妻史氏夫四旬無子史贊之娶妾生一子天奇甫
彌月而夫逝與妾育之而成立

栢完紳妻賈氏二十二歲而寡子青芳生僅三歲
賈撫之成人清苦自矢終身不二

李日暢邑庠生妻侯氏二十四歲而寡子幼公姑俱
亡守節撫孤迄今四十餘年子三桂五桂皆克成立
許克已妻郭氏二十四歲而寡執節不渝撫其一
子企渾企浩成立家範肅然

崔應繼妻秦氏三旬而寡夫家累世業農子祥鷲生方
數歲氏茹藥課讀欲興門祚松筠厲操志有可嘉

明

學山縣志

三卷三

蓋文卿本邑耆民嘉靖間人性謹厚多善行好濟貧
乏鄉人德之有臨汾人楊林醉遺金四十餘兩卿獲
焉及楊醒赴路涕泣鄉詰其銀數行裝楊具述悉如
所獲遂還之楊敬禮終身焉生子三紹仁以明經為臨
胸丞有賢聲紹義紹智屢薦賓筵世濟厥德

齊一本耆民世居邑北南王村少孤孀母栢氏失明本
力田奉養朝夕無怠垂四十年族伯齊思明老貧無子
本復養生送終盡禮焉邑侯劉伯綬高其誼表之曰孝
順存心謙恭持行家有瞽母兄貧而獨以色事族有獨
伯子缺而養且葬終至於農業無幾而恤孤寡賑貧乏

尤人所難者生子三國彥國賢國才俱入庠

蓋大綏邑之耆民也故富甲於一方天性好施於人
大有所濟遇歲晚必出其粟麥百餘石遍給鄉里之
窮乏者而於寒士則封一二金肅禮以餽之每歲皆
然恹恹謙退曾無施恩責報之心以茂德舉賓筵者
數次曾與許龍同時出粟濟饑

許龍字雲岡邑城耆民天性易良風儀魁碩平生樂
善好義累世以農事起家資產豐裕七次舉陟賓筵
萬曆丙戌之歉斗粟千錢邑民乏食餓殍相望龍出
粟千石以濟之民賴以活者數千家邑令躬親給匾

以旌其善子州尹入學食天祿為當時名士譽望崇
高克光弘緒

蓋祿養字君儲禮部儒士性剛正寡言笑尤慈惠好
施家產無幾見饑寒者輒衣食之有死葬無資者或
給銀買棺或施地葬埋親友鄰里多所有活課子姪
等誦讀凡入庠者八人

國朝

周鐸字小田邑之耆民德行茂著孝友溫仁愉色冲
儀於人多所親愛數陟賓席無一人不稱為長者疑
福久視享百齡而終子邦彥事之盡孝風徽卓越亦

其積慶之所鍾也

喬挺秀字帝梁邑增廣生世居邑城內質性淳朴
遠蓄競事親至孝居鄉恂恂若處子邑令曾以賢孝
匾其門其他行誼之藉亡者難以筆悉精舉子業屢
科不第年未知命遂隱居北鄉之阿屏絕交游者二
十餘年吾浮不發科名者五十餘載孫昌齡陡然登
康熙壬子鄉薦闈境士民無不謹譟稱快咸以為積
善之報云

齊至盛字鳴吾縣北南王村人僑寓郡城冲惠知書
賢達有令望曾以百五十金輸助闕城之役而其宗

族之在浮者則資之數百金以備緩急禦飢荒不責
其報買鹽淮揚間戲概均平公私稱便好義推賢喜
交天下士儀真諸生有英俊而孤寒者率供給書資
以獎其業名譽浹於遐方及抱病還平陽謂其子諸
生人龍曰吾有少妾在邗揚已腹娠數月分娩後當
留其息而嫁其母若係男如善遇之可畀吾資產三
分之一既而得男人龍急馳以往覓乳母攜之以歸
保全成立取名人瑞家資巨萬與人瑞平分此又善
成其志者矣

周珣字宗彞邑學廩膳生員也少孤寒獨能奮起詩
書自拔於等倫之表母姜苦節供讀年弱冠初試即
入環林秀外惠中風神簡貴事母孝撫二弟盡義盡
仁荆棟相依肅雍式好凡舉家之日用婚娶一切皆
資於珣戊申歲以德行見推抑且文居上等徐學臺
獎勵優渥有克敦孝友有光學校之褒德業日隆誠
未可量

義民

葛勳元生有至性仁惠好施數以令德預賓席世居
縣北之南王村崇禎末天下大亂巡東道李公日焜
及府廳張秘諸公帶從騎家口百餘人避難詣南王

堡勸元納而館之費用浩繁事平諸公以百金相酬
卻弗受順治丙申遭亢旱備粟數百石濟活其附近
鄉民復捐米十石佐知縣安公建大堂並出十五金
為窮民李信完罪以解其厄疎財能濟其義也夫男
邑庠生紱仁孝聰明為賢良之士豈非其為善之報
歟

張鏗性倜儻重意氣凡遇鄉人之困乏商賈之缺資
率能傾囊貸之邑民多享其利己丑之亂道鎮兵數
千請浮剽賊時倉廩懸竭官民恟懼鏗出粟數百石
以供軍大濟公後岳陽掾張朝雨損折官庫銀追比
將斃鏗出百餘金救活性命事平還報無所受義聲
昭於隣封急公好施隆鄉曲之譽行居五而與其三
光銘風烈相方子翼舒為邑庠生英發力學克承其
緒亦種德昌後之徵



張鏗居邑之南門負性孝友昆仲五人鏗居其次上
能使其兄不侵世務而精儒業下撫諸弟皆起家成
名大抵為人也厚重寡言而聰明內蘊舉動克協其
宜急公先輸尚義好施凡遇婚喪無力及饑寒無倚
者率多賴其周濟以懋德軼倫有光聖典因屢膺賓

蓮子光燦為邑學廩生天性仁孝學行兼優邑令區其門曰慈孝維風其世膺福慶也宜矣

周家鼎世居邑之東門沉靜寡營與物無競父館為明時耆碩有鄉望家鼎克循遺範無替家聲孝友睦嫻動合規度儉約自奉於世務澹如也失配二十年不復娶有古君子風兄家胤好善施德而未有子當彌留時欲以千金家產畀之辭弗受俾分給宗支之困乏者人皆嘉其有讓有司以茂德堪型匾其門年甫六喪而弟膺賓典者有三雅譽清規光孚榆里喬登俊邑城西街人風骨多奇豪健而有心計起家

寒微艱難創業克遂自致於亨途其封殖之勤經營之善蓋有大過人者五薦賓筵光膺殊寵則亦人生之希遇矣性仁惠崇禎辛巳間遭歲荒歉窮民一飽無時獨能推其有餘周恤其比閭族黨而市里貿遷之子又多藉其資貸以成家順治初詣郡城公幹遇涇陽客李孝因沉醉遺十金於路登俊拾而還之人以是稱其德為耆壽至八旬子太學生國品安靜溫仁克繩家範

楊居森居邑北之楊村河其先世實有令德乃祖億連姻潢胄負產豐殷萬曆中曾與蓋君大綏許君龍

太學生陳君萬年仗義輸粟濟飢謂之四大家延及
居森而餘慶未艾福蔭滋昌天之報施善人何若此
其厚且久也居森性行高曠丰度頎然以有德薦膺
賓典優崇赫奕庸非布衣之極寵歟子瑜亦復力學
遊泮清標玉立可謂克光世德者矣
揚昌森風儀端冲有温上恭人之度居森之同母弟
也年未知命即以茂德陟賓筵非其聲望攸崇至行
克踐詎能與於斯考其徽蹤為能友于兄弟因心篤
慶全天性之愛恆華萼之情夫是以令聞昭著作客
橋門承筐授几荷清時尚德之榮則誠乃祖為善之

報矣積厚流光理有足徵用以風示鄉閭寧非盛事

元

楊氏年十三許嫁邑人衛貞始受聘貞以商卒於遠
方楊聞而哭之哀慟失聲守志不他適有司以聞至
大八年旌表

明

郭氏邑民陳敬妻年十七而歸陳相守總數月陳以
勤王當遠戍與郭訣曰我此行歸否未可知爾能守
節保孕我即死無憾矣郭曰天相吉人必無他慮脫

有不諱我非守志終身便當從子地下其後生男名
俊陳乃竟不歸郭撫俊成立以壽考卒俊事之盡孝
即貴州布政使孜之曾大母也

張氏廩膳生員許鳳妻也聰慧而賢夫婦相與有冀
賓鴻案之風鳳美容止喜夜讀書張每携女工為之
剪燭於芸窓後鳳以疾不起張年少未有子恐其無
固志諷之曰吾家素產頗豐而篋笥中尚有十載廩
金百餘兩可以粗贍子將若何張曰若事不可知當
朝夕相從以快君志需此何為於鳳死七日之昧爽
束裝易新服向鳳靈而哭之遂自經

秦氏鄉約段守成母邑民段徵之妻徵弟叙為邑庠
生早卒遺孤段守志方在襁褓無母以鞠秦撫之盡
愛勞瘁無異所生未幾徵亦謝世守成髮未燥二孤
並育備極艱辛屢為邑豪所侵侮秦執理清辯官府為
之直二子是以克全淑慎清嚴終身如一日

國朝

周氏貢生張光先之母也端重有德容閨範母儀為
通邑之冠年三十有八而寡夫銘早卒有令望娶妾
李氏生少子光紹銘當易簀時謂周曰爾有子三人
可以相守李氏年芳子幼將若何敢以難言之事相

託周曰李氏結髮從君非他媵可比我在必無憂也
乃與李執節自厲矢死靡它未幾李亦早逝周撫光
紹恩勤有加延師教訓期其學業有成以慰夫靈於
地下光先任俠瓌奇名譽彰於遐邇天下士願與之
交每有接引周輒喜笑異平時邑令揚名世嘗褒之
曰九熊課讀既成斷杼之功祝燕明貞不墮凌霜之
節

秦氏邑庠生葛紱之嫡母端莊令淑賦性仁惠夫勤
元以茂德舉耆賓蚤逝紱生纔數歲側室所出秦生
一女外適凡一切家物並不私及其女鞠紱盡愛九

熊畫荻育之成名翁姑年及九旬秦躬致蘋蘩數十
年不懈徽音懿德作範閨門

人物

明

蓋繼富天性忠義膽力過人世居邑城之西門內當
英宗北狩時共陳福偕行赴難並隸石將軍營大戰
於鴈門關外奮勇先登甘心授命與狼曠江子一輩
曠世同規馬革餘魂飄零黃塞朝廷以陣亡優將表
其閭義烈孤忠數百年尚有生氣

後有詔官其子以陳福子
尚少皆辭不就

李一本邑南東陳村人敏之五世孫也至德宏才冠

冕士類嘉隆間以明經授陝西同官令同官店家有
號卓北峯者一布客經宿其店北峯殺之而取其財
投屍於井及一本赴任泣事方三日以公出還治將
入門忽有大風自北來旋遶其車不散霾沙震蕩其
中聞有嗚咽之聲一本私祝曰若有冤情吾當為爾
昭雪風遽止遂於片紙上書捉北風三字付二健役
俾速致之役不知所謂過野店索酒共飲其一役誤
戴同行之冠以出周遊店外陡披狂風吹落野井中
引繩以取見有布客之屍在焉駭愕回店適有人呼
店家之北峯哥北峯哥役詢之其人姓卓因執以見

嚴勳乃得其實並收其同黨三人寘於法一境稱為
神明

耆民補遺

侯諗世居邑城北街浮中之望族也質性公方好惡
是非一歸於正人以為邦之司直鄉隣之有過失者
恒面斥之雖拂意頽顏不恤直道正色有王烈之風
官於嘉其賢凡邑民有所爭訟每咨其講說以平情
區處悉當以是聲望著於一鄉諸生因薦其至行以
賓庠序輒以乏德力辭強之而後從事焉平生敦
本業鮮交與荆枝繁蔚而相好無尤年登八旬事

浮山縣志 繼母猶供子職錄付簡編用示正直之好

節婦補遺

蓋祿重妻栢氏三旬而寡清苦自待撫其二子先
第及國智勤習文業志向可嘉先第為郡掾國智
克本邑典吏並以孝稱徐學台以節孝可風旌其義

浮山縣志二卷終

浮山縣誌卷之四下冊

冊文類

宋

太上老君混元上德皇帝冊文

維大中祥符七年歲次甲寅正月戊子朔二十一日
戊申嗣天子恒謹再拜稽首言伏以先天地母萬物
大道強名而混成一希夷摠衆妙元聖無私而獨運
肆結繩之上世逮垂旒之應期必敦清淨之風乃洽
淳熙之化伏惟

太上混元皇帝神凝氣祖粹蘊帝先紀學以演真宗龍
明而開道與玉虛善應俾炎皞以得師坤用無方歷
商周而隆跡聖母發祥於慶日宣父興歎於猶龍微
言闡幽大像垂教二儀長久本清寧而不居兆庶樂
康資恬淡而魚欲首出萬古式是百王天付生民運
興有待烈祖之開創神宗之治平尚慈儉為永圖遵朴
素為常道慶鍾長族猥及渺躬寶錄歲誕惟新於元命
玉音昭晰親觀於神期喻皇世之有開示高真之幽贊
上帝克享妙本是依然則造物不私為知日用為民祈
福庶稟上仁是敢仰止靈區爰伸頌拜周爰徽號益

表欽崇夫恍惚無形生三為大茲之謂混元淵默守中吹噓
萬化茲之謂上德雖善貸常存於不有而可名恭薦於至誠
謹攝太尉推恩協謀同德守政佐理功臣王且奉玉冊玉寶
上加徽號曰

太上老君混元上德皇帝伏惟因大成而曲全務守道而貴德
儲祉善慶保鴻基之配天鑒降勤行佐冲人之治國萬方福
壽世祚千億謹言

碑文類

天聖宮紀碑

伏惟

太上老君混元皇帝青牛命駕紫氣度關執大象以臨人百王
共貫烹小鮮而治國千古同規既推輪於衆竅之門遂脫屣
於三清之墟建夫有唐之受命也肇從金晉起革暴隋止海
水之橫流非徒夏禹補天網之幅裂豈特媧皇尋追五讓之
蹤旋定一戎之業則高祖神堯皇帝廼 太上三十四代孫
也猗蘭葉茂仙李陰穠蕝源雖自隴西敦本實繫苦縣老君
以唐武德二年二月內降於平陽神山縣龍角山之狼子樹
下衣冠儼若鬢髮皤然白馬在前耀熒煌之朱鬣青童侍
側對綽約之紅顏時里民有吉善行者見而拜之因謂善行
曰爾為吾言於唐皇帝吾即汝之遠祖也汝方為太平天

子國祚靈長吾已大勅陰兵助汝破賊言訖不見善行既蒙
神告即詣長安時神堯甫定關中方畷外畧既聞所奏知曆
數在躬乃命左親都督杜昂寅奏皇華就於本山致祭精誠
上達盼嚮下同俄於大樹之間再見猶龍之表至於告諭又
極丁寧神堯既嘉受命之符且思之祖之義乃命有司於
所見之地建立祠堂仍勅四時備禮享獻其後太宗降王
世克於洛邑擒竇建德於武牢自餘羣兇相次殄滅六
合大定不三數年則一聖祖之貽謀雲孫之受慶影響之應
豈不昭昭哉開元中明皇帝荷六葉之丕畷席千齡之景
運感昊穹之靈貺恢烈祖之耿光十四年七月始下詔改老

君廟為慶唐觀仍御書觀額及碑文以賜之宸翰縱橫寶蓋
飛動金聲玉振吐天上之蘭辭鵲返鸞迴降日中之玉宇霓
添朝輝於巖壑銀鈎夜燭於星辰遐稽善美之言迥極天人
之際觀內正殿曰老君殿老君殿之次曰三清殿三清殿之
次曰三皇殿內有高祖至明皇帝六聖玉容左右鸞翔東西
鳳翥日角龍顏之像若照千官垂衣端拱之儀如臨萬國父
堯子舜其在茲乎先是斯觀營繕之初困於無水公輸為之
失色衆人於為疚心無何山椒之間瀑泉噴湧枉道屈曲流
於觀中號曰華池大濟工役既人工之告畢而神漢之亦枯
皇朝景德二年二月十五日有甘露降於老君殿之前栢樹
凝如天醕湛若帝漿既呈五色之祥迥掩三危之味尋又絳
有白鶴來翔碧空雅同遼水之歸不讓華亭之唳聲震遐迩
幾乎浹旬符瑞至多不可殫紀二千石既累蒙茂祉尋達聖
聰俄奉璽書俾如締構自正殿之外凡蓋前後三門暨道院
行廊之所內外大小摠三百餘間初觀之東南其峯峭拔藤
蘿盤屈素有洞宮之瓊珠多歷年所唐大曆中嘗勅以玉簡
金龍投於此洞至晉天福年間有奉使新羅者及至其國見
向之二寶俱汎出水中既還長安因表以進之又其洞之內
每風恬霧霽往往聞笙簫管磬之音若鈞天九成髣髴在耳
厥後時罹凶歉郡起螟蝗一方無蟲賊之虞比屋有京城之

望雖上資於帝力實允賴於神休天聖五年夏四月詔改慶唐觀為天聖峩上秘宇陋白鶴於南山肅上珎臺掩青芊於西蜀輪奐壯麗稱為最焉每歲月及正陽莫開八葉此邦士庶川驚星馳或修香火以告虔或備蘋蘩而致潔口祝具矣福祐隨之蚩上之民有足依怙六年道衆以斯觀自始崇聳垂三百年蓋因高就基實去水逾遠汲取之事我勞如何今若大備吉蠲式遵科教庶竭惟精之懇期延善利之祥於是樂佳景之流行步綱之法寅祈太上欲浚靈長乃於道院之東神厨之後方幸天從於人欲俄驚闢地以及泉厥味孔井可飲丹山之鳳其源不濁如分楚國之波雖二師之

刻山耿恭之拜井未之速也自是齋殷之事洒掃之資人無所勞用斯不匱非夫太上威靈所及疇能至是耶七年會令尹東平呂君化元用卓魯之才出涖斯邑既典一官之職尋躋三異之名與廣平焦君季卿共凜詔條叶宣風化苛政有所缺力而行之一日自公之餘同詣斯觀周覽勝槩嘆異久之因謂本觀都監賜紫道士梁志貞監觀賜紫道士段見素曰此觀肇自皇唐迄於有宋雖代数悠邈而感應滋多矧近奉天恩且更觀額而始終事迹紀述未遑蓋求白地之文以志他山之石庶垂來裔不泯徽猷二君子感慨是言欲畱不朽且

以慎言素慕神仙之道粗知辨學之源爰俾抑揚靡
克誦讓含毫增愧謹作銘云混成之教先天地生萬物
之世三才之精倚歟老氏道不虛行赫上宗唐實稱
後裔寅奉真源欽承寶位惟堯之都是為福地命氏
考姓寶惟賴鄉既開兆朕乃建祠堂承襲欽奉煥乎
有光華廟為觀五位辨方炎宋勃興諛膺駿命道冠
百王恩加億姓始改慶唐謂之天聖輪奐愈尊林火香益
盛粵有上士含和保真爰啓麗漆俾刻芳珉

熙寧辛亥冬孫景文撰

元

重修帝堯廟記

帝堯之德在人何其深且久也雖百世之下愚夫愚
婦亦知其敬焉孔子曰唯天為大唯堯則之夫如是
堯亦天也天之道動之化之生之成之其功德昭々
之不可誣也祀之南郊迎享祈報天亦未嘗不享答
焉則堯於民亦何異乎天哉古之祭法有大功德者
皆載在祀典况堯也其德蕩々其功巍々宜乎萬世
祀也當光宅天下之時乃命羲和欽若昊天以授人
時命羲仲宅嵎夷以殷仲春命羲叔宅南交以正仲
夏命和仲宅昧谷以殷仲秋命和叔宅朔方以正仲

冬四海運若神之智萬國被如天之仁帝皇治定之術天人交感之道著若畫一經制民常自天地開闢以來帝堯始正矣後世君天下者悉法堯之道而致於治所以順之則興替之則亡故孟子曰不以堯之所以治民治民賊其民者也既而萬世能遵守其道涵養百姓百姓常安家被其賜此其所以與天魚異也帝堯在位凡九十八年而崩百姓悲哀如喪考妣三載四海遏密八音何恩化所及之遠也然則堯之德不可殫紀昔吳季札聘魯聞歌唐之詩乃曰思深哉其有陶唐氏之遺民乎由此知遺風在民深且久也全晉之地至今勤儉豈非聖人之化遂與真誠而不可移也神山縣東有堯山栢樹森然回還十數里其巔有堯祠在焉自庠陋不庇風雨兵入之後愈見墮摧甚不稱所以祀堯之意也縣宰牛公承直下車之初被府檄令再完葺公遂勸率縣民使量出已財而成茲美事且舊國舊都民戴遺澤未嘗敢忘公之令下一境之人皆翕然而樂從之不獨新其廟又比舊增其廣甚多仍於止殿之前特起禹舜二殿巍然相對其後則建后妃之殿大門峙立長廊翼如計一百四十七間又以餘財於廟前之南叢栢中起亭一

所榜之曰歲寒亭傳云歲寒然後知松栢之後凋也是亭之名蓋取於此將以遺後官及縣民四時奔走香水之餘而游息於其上以此見公之用心為歲寒也廟既落成命余記其事僕則雖荒塘有餘然與公為至友不可固辭兼嘉公重飭是廟大合衆心與夫費四方民力民財修建淫祠者固有間矣於是乎欣然為公書之皇統三年歲次癸亥正月三日高平郡范橐謹記

陶唐清都萬壽宮事跡碑

全真之門有主清都者亢道純梁道法來謁曰先師元素子以非常道立觀度人勤勞甚至今已神棲玄宅顧洪衍之恩惜不可泯先生放儒業假撰述用彰厥美願也按善狀師名志玄族孫氏俗為河東萬泉人幼穎悟遭世變故翻然入道蓬轉求師得寧神子張君於代之神岡躬禮為引度祇承元素之號及寧神遷治王屋之靈都師亦行丐而南一夕夢遊清都境覺與謝智之流蹤跡之忽遇今治觀其岡阜宏敞樹木蔚茂適與同夢會駐舄聞為故縣豪趙貞趙鏜等衆聞知輒詣山尋訪訝為異人以住持請遂感動遠近接襟音者日有增新於是起堯殿於舊貫居右

別置混元殿并道院居左次之耕稼外土田數十頃
有奇為常住資功甫告成請額於上嗣教清和真人
署以清都名宮師曰先定也其何敢辭居無何責付
後事於門下希真大師王志實與道純輩叶贊行之
晚年歸寂靈都示不忘本也志實等克遵遺命不墜
先業至欲褒贊事功稱揚父師足可嘉尚其餘憑藉
聲燭星居四方者不必殫舉究源委皆自元素之傳
噫師之幻夢果何如哉意者謂志堅行篤必有陰相
神助然以丐食煉性立事紀功任人歸老較之又何
夢頃之圓哉合是數說不得不善以辨之仍繫其詞

曰道有名師寧神之嗣苟造物之所戲遽尋此而安
置聲聞漸馳其徒則朋從爾思其居則棟隆而責倚
歟倚歟其道尊其德貴壽則考名則遂可謂備矣雖
未暇擬化蝶乘風與槐安卽百慮而一致也山石
既龔揭茲銘誌一則明末保為國祈祥之地次而召
後來者存念本知報之義為至元二十九年二月吉
日浮山縣儒學教諭王庭撰

明

浮山縣公廨記

明天子肇造洪基一新寰宇立綱陳紀表正萬邦內而

朝省臺院外而分司州縣凡堂署公廨或因或革咸命
新之外特以聳人之具瞻壯都邑之偉觀蓋欲維新
一代之制度恢張一代之政治也平陽府屬邑曰浮
山僻在東山中土厚而民質地狹而民儉世傳以為
有堯之遺風為政者苟能善其政教以導之則其民
樂生喜事趨義向化特易焉耳洪武二年春汴梁徐
君秉彛以才選來丞於茲屬兵亂甫平庶事草創君
以精勤之學盡心殫力晷月而政始有緒顧惟舊廨
卑陋穿朽意欲新之復以歲荒民疲莫遂厥願繼聞
有命即鳩材庀工度後計程不急不徐民皆子趨

故基拓而闢之為正廳五楹退廨如堂之數賓幕三
楹左右案房儀門鼓譙鱗而起其規制不隘不侈不
華不朴一適厥中俶工於五年七月之首訖工於十
二月之尾既落成徐君馳狀來請記昌自洪武三年
得請於朝歸老鄉土嘗至其邑見其田野闢人民聚
吏畏法而不敢肆士循規而不敢嬉令行禁止庶務
幹集固已知其賢令新此廨居於斯萃於斯出政令
於斯聽訟於斯正欲與其僚吏同寅叶恭謀謨於一
堂之上思其所未至行其所未盡勉其所未及朝夕
惕勵益舉其職而終其緒豈徒高其堂崇其座作威

自尊以為一身之榮貴哉必也推已之安使人亦遂其安度已之勞使人亦休其勞正已以率下持綱以御衆俾事物號令一歸於理合於宜則居是堂也仰不愧俯不怍從容委蛇於其間又何意外之足意哉否則蹙焉有不能一朝安者矣安也蹙也無他公私勤惰而已噫後之繼政居是堂者請其繹乎斯文洪武五年十二月吉日徵士河東張昌撰元進士國子助教

國朝

闕聖賢廟碑記

正氣之在天地則為日星河岳在人則為聖哲忠義

在鬼神則為明赫英烈凡所以紀陰陽之運實幽明之理者莫不皆鬼神之為而鬼神中所謂英風麟炳聰明正直亘天壤窮夷夏曠千載而流光者則莫若神武闕聖賢之一人已其明威靈爽載在記錄今古為昭聖德神功與天無極即能言之士亦豈能於英靈浩蕩之下贊一辭哉嗟乎聖賢俎豆徧寰中尊親盡血氣累朝封號崇進有加非天下之至人為聖哲忠義之所歸詎能與於斯人知其為明為赫為英為烈如日月之在天河之行地抑知其生平之軼行至性曼絕倫類為萬代所瞻仰者乎方其亡命奔逐識昭烈於塵埃傾蓋定

君臣之分而授以肝膽死生之信以至間關於河朔顛沛於下卸戮力相從百折不易此其始終為漢之心質之春秋大義其在王正月大一統之間歟蓋聖賢學宗春秋故其行事多與春秋合表三約於危難義無二信也脫孟德於華容服而舍之也絕婚於東吳魚境外之交也抗節於章鄉受命有死無賈也至於旗鼓相當之言與中原索韉之對與雄本色異代同符躬覽載籍心體力行昌明王義集春秋之大成是豈元凱以下所可及乎且其誅雄斬良東燭封金聲震許洛威陵江漢英武廉節又有大過人者史稱其勇冠三軍有國士之風豈徒然哉而議者謂其義勇雄傑而短於計善撫卒伍而驕於士大夫嗚呼是豈足以知聖賢哉大約稟剛大之氣者多不能柔克而亦無所事於權譎聖賢以坦懷正性待天下猶是趙武信以為本之心也當其出師攻樊何嘗不留兵以為備及遜代蒙卑辭自託聖賢方以小兒視之又以吳蜀正睦諸葛瑾之報命未寒湘水界之盟約方固義堅同仇未有所嫌豈能逆觀其有是耶抑當時之士大夫漸染於東京風物雖多曲謹儒雅無所當於王佐之期向其所接者又未必其極當世之選以聖賢曠

度如天英畧盖世即有所驕矜傲睨於其間亦無足異
在今日有志之士不能方 聖賢之萬一於庸腐輩
且或輕之而况大英雄之目空一世者乎邑之南偏
有 聖賢廟狃自萬曆乙酉為邑中正祀彼時 聖
賢尚為英烈王歷歲頗深殿宇廊舍胥就傾圮雖亦
徐為補葺而浩大之工莫繼是用未訖於成己亥歲
邑大夫楊公名世入廟興慨因捐施修葺銀若干兩
為士民倡乃謀於本邑社人博集衆緣大施丹雘數
年來未成之工不踰期而告竣則楊公董率省試之
力烏可少哉今茲廟貌崇開神靈景悼福善禍淫

於是乎在有奸雄遇此當仔細思量也凡我庶類其
亦怵心於邪正之分禍福之應無為 聖賢之所棄
可爾順治庚子歲中秋吉旦邑庠廩膳生員秦紹襄
重修明倫堂記

浮邑學宮創始不知何年歷代相沿以至於明洪武
二年又重建焉後雖屢有修葺不過稍為補塞迄今
歲月積深風雨摧剝棟宇將頽而椽吻半折當余先
君致政歸里時仰止歎歎亟欲作振起計因宦淺囊
薄不克首事居無何竟成賫志余家密邇宮墻托
聖賢之啓牖襲祖宗之餘蔭父子兄弟叨列儒紳繼承

之思固未嘗斯夕置也第數年來旱蝗相尋兵燹旁
午會逢鼎革忽焉如夢心血家計幾同瓦解謀生不
贍遑及廟貌乎比來幹止頓寧幸值我閩東 楊夫
子愛士若蘭視民如子甫下車即以修葺相諭且捐
俸金作多士先噫嘻 夫子之命也亦余先君之志
也爰以斯堂自任其大成殿檣星門翼墻掖門以及
圍垣俱 楊夫子之獨任至啓聖泮沼齋廡戟門鄉
賢名宦義路禮門遜以為諸君子地敢貪人功以為
獨有乎將次落成竊以賢侯之雅意足多前人之遺
志難忘雖多事之後不敢愛卷石於泰山也脫曰

惠冥漢賈譽鄉曲則鄙之乎窺 余矣若乃天眷我後衣冠奕
世而紹書香者容留意茲事則斯堂固屹乎克壽我先君崇
儒重道之懷借以永存余小子紹乃先業之意亦將憑以不
敝矣斯又 余意中事而不敢知者也謬為誌順治四年孟夏吉
旦邑庠增廣生員張令名偕男生員三鑑孫生員 勒石

宋 銘類

訓廉銘 二銘退思堂有石刻不知沒於何時

周典六計吏治條陳以廉為本乃良而循肆彼貪虐與豺虎
均肥於其家多瘠吾民縱違於法愧其冠紳貨悖而入菑及

後人我朝忠厚黜貪為仁咨爾群辟是訓是遵

訓刑銘

民吾同胞疾痛猶已報虐以威刑非得已仰惟祖宗若保赤子
明謹刑獄惻怛溫旨金科玉條毫析銖累夫何大吏蔑棄法
理逮於郡邑濫用笞箠興聽朕言式克欽止

行狀類

漢

霍光

霍光仲儒之子驃騎將軍去病之異母弟也漢武帝
時為奉車都尉後元元年上欲去鉤弋夫人之子弗

陵察群臣唯光忠厚可任大事乃使黃門畫周公負
成王朝諸侯圖以賜光二年正月上病篤光問曰如
有不諱誰當嗣者上曰君未喻前畫意耶立少子君
行周公之事已丑立弗陵為皇太子丙寅以光為大
司馬大將軍受遺詔輔少主丁卯帝崩太子即位是
為昭帝以光領尚書事光輔幼主政自己出天下想
望共風采元始二年春封大將軍博陸侯三月遣使
賑貸貧民種食秋詔所貸勿收責除今年田租六年
罷權酷官輕徭薄賦與民休息南北和親百姓充實
稍復文景之業焉元鳳元年上官桀之子安有女即

霍光外孫欲因光納之光以幼不聽安遂因帝姊蓋
長公主納入宮為婕妤月餘立為皇后於是桀安深
怨光而德蓋主知燕王旦以帝兄不得立常怨望乃
令人詐為燕王書言光出都肄郎羽林道稱蹕擅調
蓋幕府校尉專權自恣疑有非常候光出沐日奏之
書奏帝不肯下明旦光聞之止畫堂不入有詔召大
將軍光入免冠頓首謝上曰將軍冠朕知是書詐也
將軍無罪調校尉未十日燕王何以知之且將軍為
非不須校尉是時帝年十四左右皆驚而上書者果
亡後桀黨有譖光者上輒怒曰大將軍忠臣先帝所

屬以輔朕身敢有毀者坐之自是無復敢言後桀等
謀令長公主置酒請光伏兵格殺之因廢帝立燕王
蓋主舍人知其謀以告詔捕桀等族誅之蓋主自殺
燕王自絞死皇后以年少不與謀亦以光外孫故得
不廢元平元年帝崩無嗣光與群臣迎立昌邑王賀
王既立淫戲無度諫多不聽光憂憊問所親故吏田
延年田延年曰將軍為國柱石審此人不可何不建
白太后更選賢而立之光曰於古有此不延年曰伊
尹相殷廢太甲以安宗廟後世稱其忠將軍若能行
此亦漢之伊尹也光乃陰與張安世圖計率群臣白

太后廢之更立史皇孫之子病已是为宣帝本始元年光稽首歸政上謙讓不受諸事皆先關白光然後奏御四年春立光女为皇后地節二年春光病車駕臨問为之涕泣光上書謝恩願分國邑封兄孫山为列侯即日拜光子禹为右將軍光薨謚曰宣成賜葬其如乘輿制度置園邑三百家为麟閣功臣第一

五代

桑維翰

桑維翰後唐清泰初为河東節度使石敬瑭掌書記三年五月唐主從珂慮敬瑭有異志改為天平節度

使敬瑭疑懼謀於將佐曰吾之再來河東也主上面許終身不除代今忽有是命得非如千秋節與公主所言乎我不興亂朝廷諱之安能束手死於道路乎維翰曰主上初即位明公入朝主上豈不知蛟龍不可縱之深淵然卒以河東相授此乃天意假公以利器也公明宗愛婿契丹主素與明宗約为兄弟誠能推心屈節事之萬一有急朝呼夕至何患不成敬瑭意遂决令維翰草表稱臣於契丹約事捷之日割盧龍一道及鴈門關以北諸州與之表至契丹主大喜傾國赴援敬瑭遣都押衙劉知遠將兵助之大敗唐

兵唐主携傳國寶自焚死諸將校皆飛狀迎敬瑭遂
即位為大晉皇帝改元天福契丹主謂晉主曰桑維
翰盡忠於汝且以為相乃以維翰同平章事二年兼
樞密使時晉新造藩鎮多未服從兵火之餘官殫民
窮而契丹微求無厭維翰勸晉主推誠棄怨以撫藩
鎮卑辭厚禮以奉契丹訓卒繕兵以修武備務農桑
以實倉廩通商賈以豐貨財數年之間中國稍安初
晉謀徙大梁維翰因說以大梁北控燕趙南通江淮
水陸兩會資用富饒晉主乃下詔東巡遷都汴州時
張延光與張從賓反羽檄縱橫從官洵惧獨維翰從

容指畫神色自若待賓客不改常度衆心差安六年
六月成德節度使安重榮執契丹使者上表請伐契
丹凡數千言大抵斥晉主屈事契丹竭中國以媚無
厭之敵維翰密上疏曰今天下粗安蒸民困敝靜而
守之猶惧不濟可妄動乎契丹與國家恩義非輕信
誓甚著彼無間隙而自啓釁端就使克之後患愈重
萬一不克大事去矣且陛下免於晉陽之難而有天
下皆契丹之力也不可負之願陛下訓農習戰養兵
息民俟國無內憂民有餘力然後觀釁而動上必有
成矣晉主謂使者曰朕比日以來煩懣不決今見卿

奏如醉醒矣後為楊光遠遂出維翰七年晉主珣兄子齊王重貴立與契丹絕好開運元年以馮道為太尉侍中道為相依道兩可無所操決或謂晉主曰陛下欲禦北兵安天下非桑維翰不可遂罷道復置樞密院以維翰為中書令兼樞密使事無大小悉以委之數月之間朝廷差治維翰兩秉朝政出楊光遠景延廣於外至是一制指揮節度使十五人無敢違者時人服其膽畧朔方節度使馮暉上章自陳未老可用而制書見遺維翰召學士為詔答曰非制書忽忘實以朔方重地非卿無以彈壓比欲移卿內地受代亦

須奇材暉得詔甚喜時軍國多事咨請輻輳維翰隨事裁決初若不經思慮人疑其畧退而熟議之亦終不能易也三年十一月契丹大舉侵汴時維翰罷為開封尹以國家危在旦夕求見言事晉主辭不見又詣執政言之執政不以為然退謂所親曰晉氏下血食矣十二月契丹入大梁執晉主重貴以歸維翰亦遇害維翰生有奇表官樞密時威嚴自持老將見之雖冬月未嘗不流汗宋儒胡致堂曰晉主為楊光遠而出桑維翰為杜仲威而出劉知遠此亡國之本也契丹之事翰遠任之有餘矣委付不專則心不固設

施不久則政不堅他日契丹之入維翰無權而知遠
顧望蓋晉祖使然爾

明

陳

陳孜字勉學少孤育於繼母范氏中成化乙酉鄉試
第四名壬辰第進士登其寬榜初授浙江慈谿知縣
興學校以育賢才敦孝弟以厚風化民有濱海田歲
久湮沒徵稅如故奏請除之百姓稱快大新邑學重
立董孝子祠又於縣治前創津書院一所選令俊秀
楊子器姚謨等二十餘人讀書其中俾名儒錢源教

之暇則親為講解後多登第為名臣戊戌擢貴州道
監察御史將行老幼悲泣送者不啻以萬計至驄馬
橋擁輿令不能即去脫其履懸之邑門及巡塩兩淮
商人多勢要一以公平正大處之無敢犯其令者巡
茶陝右用法嚴明私販跡時吏部尚書尹旻子編
修龍所為多不法抗章論之悉罷黜巡按山東舉賢
能糾貪墨貞度肅僚大振風紀弘治初首陳十四事
朝廷咸採而行之己酉陞湖廣按察副使錄囚湖南
北多所平反施州苗白嘴鼻負固恃強奪宣慰之印
十餘年官不能取時天官馬文升為司馬檄令孜提

兵討之收聞命甚喜妻病劇不治束裝即行及至詢諸父老得山川之形勢乃選漢土軍二萬親為節度其東自以精甲當其北苗所居之地名銀山嶺前憑大江後倚峭壁自來官兵從未至其地收令諸軍薄暮蓐食銜枚疾趨昧爽直抵其巢賊不意我兵猝至皆驚擾四奔收傳令曰吾所誅者白嘴鼻一人耳無預若事諸苗聞之悉解甲投戈而降擒渠惡五十人餘置不問收其所奪印五顆捷報欽賜赤織金紵絲衣一襲鈔一千錠馬公文升覆奏曰陳收不避艱險

躬抵賊穴平負固之苗獲以失之印竭忠為國奮不顧身若以尋常之賞酬功恐後勤事者解體於是緞加以四鈔亦倍焉且勅吏部進階值其繼母范氏卒即解任歸服闋再任湖廣副使弘治己未進雲南按察使執法如山風行六詔巡撫都御史陳金巡按謝朝宣連章薦其才大可用疏竟留中壬戌當朝覲黔國公沐崑覬贖金三百兩弗受沐公贈詩曰明如霽月懸銀漢清似寒冰湛玉壺癸亥進陝西右布政使辭不行朝廷令山西撫臣催促赴任陝西撫臣移文敦請不得已於甲子暮春始至任未幾進貴州左布



原件短缺

P22

政使及致仕鄉居朝廷命有司待以優禮歲時存問
嘗以天下宗枝日繁而國家財用有限恐十年之後
民不能支欲加裁損庶民困少蘇又以宦官鎮守各
省日糜廩餼而百端擾人無益於事宜悉革去疏上
朝廷不能用平生簡靜寡言笑對妻子如賓客疾惡
甚嚴不干權要居官三十餘年著羔羊素絲之節曾
祖敬祖俊俱隱德弗耀父福贈文林郎監察御史五
子大經等皆為縣尹見與桑維翰等並祀鄉祠

五言律

時物動秋色感之一沾襟

王公石

驅車出揚村遙指黑山陌苑上村中柳青上山上栢
險阻開蒼莽忽見一片石岐路紀浮山云是王公跡
隱上石上文摩挲識其畫不見峴山碑歲時忽復易
苔蘚蝕龜趺風雨剝螭額望之淚猶墮忽上流餘澤
伊昔升公堂言容儼朝夕對此墊踟躕凄然烁草碧

嘉靖五年秋知平陽府前監察御史開州王濬題

七言絕句

霜毫感應早呈祥誰布黃金建寶坊古殿幡花遠真

聖美名靈跡異諸方

其二

殿庭松栢午陰濃地占神山絕境中瑞質有靈千古
在金田疑是玉蟾宮

推忠佐理功臣金紫光祿大夫行尚書吏部侍郎
知樞密院事上柱國 宋王 隨

七言律

齊宿天聖宮夜坐

偶來齊宿興何濃羊角山頭有亂峯暮靄輕疑千樹
柳淡烟橫抹數行松鶴歸閑苑仙聲靜雲歛瑤池月

影重自是清霄清不寐恍疑身世脫凡蹤

明王 綸

龍角山禱雨

誰留福地此山崇疊翠連延在郡東半畝華池念
造化萬家民物賴神功風雲屢出昭靈異霖雨頻施
致歲豐三晉已沾恩惠久還期大有四方同

明王 綸

詩 餘 天聖宮

翠栢丹崖碧雲深鎖神仙府勢盤龍虎樓觀雄中土
我欲停時又恐斜陽暮黃塵路客懷良苦滿目西山

雨

點絳脣

元大德丙午中秋月上旬有九日翰林修撰同知
制誥兼國史院編修官奉訓大夫監察御史郭章

誥物類

明

張璪

勅曰朕惟鴻臚之職禮儀是司其條目為甚繁其官
屬為最盛既量材以授任必考績以推恩爾鴻臚序
班張璪釋褐成均列官朝籍肅班行之進止糾禮節
之愆違勞貫良多課功惟最肆稽國典庸示褒恩茲

特進爾階登仕郎錫之勅命

王相

勅曰教子以忠必使之効勞於國勸臣以孝必為之
致寵於親業有能光於前恩則務從其厚爾陝西行
太僕寺王相乃光祿寺署丞王璽之父世家儒業卿
寺能官篤成令子之才茂著賢勞之績茲特贈爾為
承德郎靈爽有知榮光不替

王璽

勅曰烹飪之司御庖是掌故既置卿以領寺而又分
署以備員向非其人曷稱茲任爾光祿寺掌醢署丞

王璽蒞跡成均列官卿寺操持罔玷出納惟精官評不佚於陟門國典預加乎褒寵茲特進爾階徵仕郎於戲列於庶位固繁簡之各殊慎乃攸司必始終之無怠勉圖後效以迓新恩欽哉
段良善

勅曰官不計其崇卑必求其稱事不論其難易務底於成爾蔚州左衛經歷司收糧經歷段良善發身胄監列職幕僚綜理惟勤操持罔懈屬當大慶互示褒恩茲特進爾階徵仕郎錫之勅命

衛春

勅曰朝廷推恩臣下而必及其親者所以重本而勸孝也爾光祿寺大官署署正衛鏞之父衛春慶鍾厥子而祿養不逮揆其所自宜有顯褒今特贈爾為儒林郎光祿寺大官署署正靈其不昧尚克承之

楊郁然

勅曰昔人以別駕之任始展驥足何重之也滇僻西南遠在天際以故佐郡之選尤資逸驥之才卓有循聲褒之宜亟爾雲南尋甸府通判楊郁然識練而沉器閎以偉明經拔俊筮仕遐方乃贊績行春而敷仁攝篆至於功深疏濬剔弊催科皆其著譽於垂棠是以屢騰於薦剡茲以歲閱

授爾承德卽錫之勅命

張萬壽

勅曰國家推恩而錫類臣子懋德以圖功懿典攸存忱
恂宜勗爾四川成都府漢州知州張萬壽持躬克謹蒞
事惟勤司牧有年恪共奉職吏治著循良之績官常彰
清慎之聲慶典攸逢新綸用賁茲以覃恩特授爾階奉
直大夫錫之誥命於戲式弘車服之庸用勵顯揚之志
尚欽榮命益矢嘉猷

梓里

萬年燈

邑西南之任張村有仙人張果墓在本莊西嶺之半
名栢林坡卽月山東麓也丘壟宛然土人禁樵牧不
得入其後裔見居本村溝南莊去壟可二里許云係
果家之舊址故老相傳其壟恒有異光多於夜分時
見遇太平則皎若曙星謂之萬年燈五代迄明屢起
屢滅洪永至成弘間光最盛自後漸希土人以年久
無徵遂不復信其事及萬曆乙卯忽又復見不踰紀
復隱識者以為此科甲興起之兆謂舉人高捷自陳
攷登第後百餘年至乙卯始發科故也本朝康熙壬
子歲其光又見閃爍熾煌有似蓮炬土人私識以驗

之而諸生喬昌齡復中是科鄉試其瑞應在科甲無疑因錄之以表其異其光遠而彌耀百步內視之則否

玉兔記

唐高祖登極二載平陽西北即今汾西地時有玉兔見帝遣使祭之勅令置玉兔觀四時享祭至高祖麟德兔復見帝亦遣使祭之增修觀宇至則天皇帝通天二年兔又復見履空而行帝遣中使王文泰求獲玉兔平陽太守杜承衍躬往求見兔出徐步趨之經數日兔至平陽東神山縣西南隅即今故縣城而隱跡文泰與承衍尋於隱處穿地求之丈餘獲得玉石

兔一軀端麗無並上貢則天命建玉兔觀於神山縣多慶道流以奉祀之後改觀為寺至今如故

羅漢現身記

唐長安二年春刑部尚書李景授河東路巡按使與副使王求署同至平陽會太守錢光演曰僕昔於通天二年會前守杜承衍叙玉兔觀之由僕願陪二公至其地以觀既至登閣四顧天色晏然雲霞並息回首東望遙見風穴山東白光似雪忽然而上貫青霄不動而時移三公即令使急馳以觀使至中途遇樵叟陳文一樵子李八兒荷空擔奔歸使問其故曰風

穴山東脚下有一美貌奇僧引十餘大虎頂放白光
用手招文一等曰汝即回與李尚書王太傅錢太守
說羅漢要與公等相見使即回同二樵夫相報公等
相顧駭愕既而即馳至羅漢前瞻拜羅漢備道吾姓
楊氏父任青州刺史母姓高氏好持素朝夕禮佛吾
年十二愛慕空門出俗至南嶽山禮大禪師乞為弟
子數載了悟神通廣大飛騰往來吾見此山之下有
十餘大虎在此傷人多欲除害為祥回和為正聖道
圓滿即當歸真吾身化後無復奢侈焚修埋塋但於
禪於庵內如在而坐公等曰聖朝明也當今重佛願
聖者莫歸真公等伏拜舉頭果見聖者端然殮逝即
改觀為去田道為僧以奉祀之後至清恭乙未歲正
月十八日獵人郭遇郭欽王恩蘊徐守元等四人見
玉兔入於孔穴以鑿掘之既深見有庵門掩閉推而
視之見聖者金身如在復於庵壁上見有聖者道語
恐壁壞而文墮即錄之傳於不朽

甘泉

邑之東山名曰四十里橫嶺乃上黨一帶通衢宿處
也汲道甚遠行人苦之於康熙十六年十月知縣潘
廷侯任內道傍突出數泉色澄味甘以利行人知縣

潘廷侯隨通詳各上司皆有獎語

浮山縣志四卷終



